

景縣志卷之七

人物志

行藝

選舉

職官

叙曰太上有立德其次有立功其次有立言是謂三不朽
士君子求志達道爲醇儒爲名宦豈非邑里之光榮後來
之矜式哉蔣封百里江都咸陽而外豐功偉績與夫忠孝
節義之風彪炳史策前後相望何其盛也五代以還傳者
蓋鮮然近代之賢哲義士文武人才以及閨閣貞媛其言
行之可爲矜式者較古人亦無多讓例如薦擢徵辟有其
德而位必隨之錫職封爵有其位而德必副焉洎乎科舉
廢學校興科學之講求蒸蒸日上而文學武功更足生鄉

邦之色推之卽一行之善一藝之長倘使湮沒而弗彰亦載筆者之過爰採其懿行盛績彙輯如左志人物

行藝上

鄉獻 孝友 義行 德壽

鄉獻

漢

董仲舒字寬夫廣川人少治春秋孝景時爲博士武帝卽位舉賢良文學之士前後百數仲舒以賢良對策第一天子以爲江都相事易王中廢爲中大夫主父偃竊奏其居家所推說災異上召視諸儒下仲舒吏當死詔赦之公孫弘希世用事尤嫉仲舒乃言于上使相膠西王以病免凡兩

相驕王正身以率下數上書諫爭教令國中所居而治及去位家居以脩學著書爲事朝廷如有大議就其家問之漢自武帝初立魏其武安爲相而降儒及仲舒對策推明孔氏抑黜百家立學校之官郡舉茂材孝廉皆自仲舒發之年老以壽終于家家徙茂陵子及孫皆以學至大官初劉向稱仲舒有王佐才而向子歆常過其父言然以爲仲舒遭秦滅學之後六經離析下帷發憤潛心大業令後學者有所統壹爲羣儒首云

晉

高瞻字子前身長八尺二寸英爽有俊才光熙中調補尙書

郎永嘉之亂還鄉里與父老議北徙歸王浚至見浚政令
無恒乃依平州刺史崔毖之謀伐慕容廆也瞻固諫不
聽毖敗廆署爲將軍稱疾不起廆敬其姿器數臨候撫其
心曰君之疾在此豈以殊俗不可降心乎瞻益辭疾篤廆
深不平之以憂死

燕

封孚字處道祖悛振威將軍父放慕容暉吏部尙書孚幼聰
敏和裕有士君子風慕容寶時累遷吏部尙書後歸慕容
德位任崇重謙虛博納甚有大臣體及超殘虐孚屢匡救
不納嘗謂孚曰朕于百王可方誰對曰桀紂之主超大慚

怒孚徐步而出不爲改容麴仲謂孚宜還謝孚曰行年七十惟求死所耳竟不謝以超三年卒年七十一

北魏

高謐字安平父湖在循吏志謐有文武才天安中召除中散專典秘閣肅勤不倦高宗深重之拜秘書郎時墳典殘缺奏請廣訪羣書大加繕寫由是代京圖籍莫不審正拜蘭臺御史尋轉治書掌攝內外彈糾非法當官而行無所畏避太昌初追贈太尉公青州刺史謐武貞

高樹生謐長子性通達不事生產陽平王頤討蠕蠕假樹生鎮遠將軍都將先驅有功樹生意在浮沈自適不願職位

辭不受賞論者高之居宅數有赤光紫氣之異鄰伍驚恐
僉謂宅不可居樹生曰何往非善安之自若孝昌初北州
大亂以樹生有威略授大都督鎮捍舊蕃尋卒追封渤海
王謚文穆樹生長子卽齊神武也神武子孫志不復載

高眞謚長兄也有志行兄弟俱至孝父亡治喪墓次甘露白
雉降集焉有司以聞詔標閭里官安定太守甚著聲績卒
大昌初追贈謚曰武康

高微字榮顯聰敏有氣幹起假奉朝請假員外散騎常侍使
于厭噠西域諸國皆敬憚之破洛侯烏孫因獻名馬又假
平西將軍再使厭噠還至抱罕屬莫折念生反河州刺史

肅祚以憂死衆共推徽行河州事綏接有方兵士用命徵
兵吐谷渾破走賊衆尋復攻逼力屈城陷與兄子春俱遇
害永熙中贈司徒公冀州刺史謚文宣春字明珍有器尙
永熙中贈官謚曰文景徽子歸義有志烈俱使西域還爲
西征都督每有戰功後沒于陳太昌初贈官謚曰孝貞

封軌字廣度沈謹好學博通經傳武邑孫惠蔚每推軌曰封
生之于經義非但章句可奇其標明綱格統括大歸吾所
弗如者多矣善自脩潔儀容甚偉或曰士不事修飾此賢
何獨如此軌聞笑曰君子正其衣冠尊其瞻視何必蓬頭
垢面然後爲賢言者漸退太和中使高麗歸上明堂議行

東郡太守夏州事所在有聲以廷尉少卿加征虜將軍卒軌初爲郭祚所知祚常謂子景尙曰封軌高綽二人並幹國之才吾平生不妄進舉而每薦此二公非直爲國求賢亦爲汝等津梁也軌旣以方直自業綽亦以風槩立名高肇拜司徒綽迎送往來軌竟不詣綽顧不見軌乃遽歸曰吾一生自謂無愆規矩今日舉措不如封生遠矣軌常作務德慎言遠佞防姦四戒長子偉伯以忠節顯弟述見循吏志

封偉伯字君良弱冠除太學博士朝廷大議皆預焉正光末爲肅寶劄關西行臺郎及寶劄謀逆偉伯潛結豪右謀舉

義兵事泄見害永安中贈官授弟翼爲給事中偉伯爲孝
經難例九條皆發起隱漏又討論禮傳詩易疑事數十條
儒者稱之又上明堂圖說六卷撰封氏本錄六卷并詩賦
碑誄雜文數十篇

封回本名叔念鑒之子慕容暉太尉奕之後也爲懿孫磨奴
嗣高祖賜名回襲爵富城子除安州刺史山民愿樸父子
賓旅同寢一室回下車勸令別處其俗遂改授瀛州刺史
時寇亂之後加以水潦百姓困乏回表求賑恤免其兵調
民甚賴之尋爲都官尙書冀州大中正滎陽鄭雲以貨得
安州詣回問安州治生可事爲便回答曰卿荷國寵靈位

至方伯雖不能拔園葵去織婦宜思方略以濟百姓如何
見造而問治生乎封回不爲商賈何以相示雲慚媿失色
後爲右光祿大夫遇害于河陰贈司空公定州刺史諡曰
孝宣

封隆之字祖裔小名皮父回隆之弱冠仕州郡主簿起家奉
朝請延昌中道人法慶作亂隆之擒獲慶賜爵武城子爾
朱兆入洛莊帝幽崩隆之以父遇害常懷報雪持節東歸
圖爲義舉與高乾等襲州城尅之遣子子繪迎神武于滏
口神武破兆軍廣阿以爲北道大使留鎮鄴尋徵爲侍中
封安德郡公隆之表以先爵富城子及武城子轉授弟子

孝琬等朝廷嘉而從之後爲斛斯椿等所構逃歸神武召赴晉陽天平初復入爲侍中預遷都議孝靜卽位除吏部尙書以本官行冀州事擒陽平賊路紹遵元象初加開府興和元年復徵爲侍中累官尙書右僕射高仲密之叛冀州扇動詔隆之慰撫文襄密書與隆之欲悉收其枝黨家累以懲將來隆之以爲恩詔旣行埋無追改今若收治示民不信脫或驚擾所虧殊大啓于神武寢之隆之素得鄉里人情頻爲本州留心撫字吏民追思立碑武定三年卒年六十一神武後至冀州境次于交津追憶隆之令參軍宋仲義以太牢就祭焉贈太保諡曰宣懿

高允字伯恭祖泰父韜以英朗知名魏平中山以爲丞相參
軍早卒允少孤夙成有奇度清河崔宏見而異之歎曰高
子黃中內潤文明外照必爲一代偉器年十餘推財與二
弟而爲沙門名法淨未久而罷性好文學負笈千里博通
經史天文術數神嘉四年徵拜中書博士後以勳賜爵汝
陽子領著作郎紹與司徒崔浩述成國記勅以經授恭宗
甚見禮待世祖問允曰萬幾之務何者爲先是時多封禁
良田而游食者衆允因以田事爲喻世祖善之遂除田禁
悉以授民遼東公翟黑子有寵于世祖奉使并州受布事
發問允首乎諱乎允曰公帷幄寵臣答詔宜實黑子不從

遂獲罪及崔浩以史事被收允直中書省恭宗召允欲導之脫與俱入見帝問國書皆浩作不允曰臣多于浩帝大怒恭宗啓帝曰允小臣迷亂失次臣向問皆云浩作帝問允允曰殿下哀臣侍讀日久欲丐臣生耳實不問臣不敢迷亂帝以爲直而宥之恭宗後讓允允曰臣與崔浩同事生死義無獨殊誠荷殿下大造之恩違心苟免非臣之意恭宗動容稱歎允後與人言我不奉東宮導旨亦恐負翟黑子也高宗卽位允頗有謀不蒙褒異終身不言高宗將大起宮室允諫止之又以風俗婚娶喪葬不依古式疏陳五異尋拜中書令司徒陸麗曰高允雖蒙寵待而家貧妻

子不立帝幸允第惟草屋數間布被縑袍厨中鹽菜而已
帝歎息曰古人清貧豈有此賜帛五百疋粟千斛拜長子
忱爲長樂太守進爵梁城侯高宗重允嘗不名呼爲令公
顯祖居諒闇乙弗渾專擅朝命太后誅之引允禁中叅決
大政允始請郡國建學立博士助教學生等顯祖從之以
老病乞骸骨不許著告老詩作徵士頌皇興中詔兼太常
至兖州祭孔子廟謂允曰此簡德而行勿有辭也從顯祖
北伐又上北伐頌帝時有不豫以高祖冲幼欲立京兆王
子允涕泣諫繇是傳位高祖進爵咸陽公以疾告歸尋以
安車徵至拜鎮軍大將軍領中書監允上酒訓高祖悅之

太和十年加光祿大夫金章紫綬朝之大議皆諮訪焉十一年正月卒年九十八前後賜賚從來莫及朝廷榮之贈侍中司空公冀州刺史諡曰文允初與游雅張偉同業相友雅常論允曰崔公謂余高生豐才博學一代佳士所乏者矯矯風節耳余亦然之司徒之譴聲嘶股戰宗欽以下都無人色高子申釋是非音韻高亮明主爲之動容向之所謂矯矯者更在斯乎宗愛任勢王公望庭畢拜高子獨升階長揖向之所謂風節者得不謂此乎其爲人物所推如此允弟推字仲襄太延中妙簡行人推以薦使于宋南人稱其才辯弟變字季和亦有文才世祖每詔徵辭疾不

應恒譏兄允屈折久官栖泊京邑允子忱見循吏忱弟懷
字士仁累官中散恬淡退靜不競世利在散輩十八年不
易官子綽見循吏志

高祐字子集小名次奴本名禧高祖賜名祐允從祖弟父讜
祐博涉書史材性通放初拜中書學生招下邵郡賊賜爵
建康子高祖拜秘書令奏請參造國書高祖嘗問止災之
要曰旌賢佐政敬授民時問止盜之法曰宰守貞良後疏
言選舉不當專簡年勞動舊才非撫人不宜委以方任高
祖皆善之假東光侯出鎮滑臺令縣立講學黨立教學村
立小學又令一家自立一碓五家共造一井以供行客不

聽婦人寄春取水又令五五相保盜發連坐初雖煩碎後
風化大行寇盜止息徵宗正卿卒孫顯見循吏志

高諒字修賢顯之弟少好學多識強記居喪以孝聞太和末
京兆王愉開府辟召高祖妙簡行佐諒與其選正光中爲
徐州行臺屬元法僧之叛逼諒不從爲所害朝廷痛惜之
又下詔以諒臨危授命誠節可重再贈使持節平北將軍
幽州刺史諡曰忠侯

高道悅字文欣遼東人父元起魏武邑太守遂家于蓀道悅
少爲中書博士轉治書侍御史加諫議大夫正色當官不
憚強禦詔曰謇諤之誠何愧黯鮑車駕將幸鄴高祖欲從